



# SUATEA



## COMUNICÁU DE PRENSA - EDUCACIÓN

---

### SUATEA ANTE L'ANICIU DE CURSU N' ASTURIES

Cumplida yá la primer selmana de trabayu nos centros educativos públicos, el sindicatu mayoritariu de la enseñanza pública asturiana entiende que puede facer les siguientes consideraciones sobre l'entamu de cursu n' Asturias.

No referío a la ufierta de puestos de trabayu pa PROFESORÁU INTERÍN, tenemos que denunciar el gran número d'errores **que se detectaron nes convocatories de places**. Munches persones a les que se-yos axudicó un puestu de trabayu comprobaron, al presentase nel centru, que dicho puestu nun esistía; d'esta miente resultaron gravemente perxudicaes, al quedar pa pidir en siguientes convocatories, a pesar del bon llugar qu'ocupaben nes llistes. Per otru llau, delles decenes de vacantes ufiertaes primeramente al profesoráu interín, acabaron siendo axudicaes **ensin publicidá nin tresparencia a profesoráu funcionariu llegáu d'otros centros o comunidaes**. Muchos d'estos erros podríen correxise si esistiera, como años atrás, un plazu de reclamación previu a l'axudicación definitiva.

A día de güei inda existen numberoses places de sofitu, asina como otres que demanden los centros y que l'alministración paez decidida a nun cubrir.

Magar el cursu pasáu la contratación al entamu fuera de 1796 interinos, esti cursu pasa a ser de 2409, anque esta cifra a priori resulta positiva ye necesario facer delles puntualizaciones:

1.- Estes 613 “nueves contrataciones” sustitúin al profesoráu que se xubiló'l cursu 10-11, por tanto podemos dicir qu'esiste una **reconversión de puestos de trabayu estables en puestos precarios**, colo que pasamos d'una tasa d'interinidad del 16,2% al 21,74%. A esto hai qu'añadir que de les 2409 places unes 600 son de media xornada: esti tipu de contratación que va unos años yera una esceición, nos últimos cursos ta convirtiéndose nuna situación habitual, lo que fai'l trabayu interín entá más precariu. Amás, les medies xornaes maquillen les cifres de contratación: si hubo alrededor de 600 xubilaciones (puestos de xornada completa) y se realicen 600 contrataciones a media xornada, lo qu'asocede ye que **se tán perdiendo 300 puestos de trabayu reales**.

2.- Amás d'estes 2409 places dalgunes son sustituciones destinaes a cubrir baxes de funcionarios/es de carrera y de duración inferior al cursu escolar. En munches ocasiones **solicitemos a l'Alministración que s'indique coales son “vacantes” y cuáles sustituciones pero niéguese a ello ensin nenguna xustificación**, col perxuiciu que supón a la hora de pidir pal personal interino. Llogren asina de nuevu, con esta estratexa, **falsiar la cifra de puestos de trabayu efectivu en decenes, cientos,....**datu que nun podemos nin siquiamente envalorar.

La desapaición efectiva del presupuestu asignáu a distintos “Programes educativos”, supunxo un **RETAYU DRÁSTICU NEL DINERU DEL QUE DISPONEN PA “GASTOS DE FUNCIONAMIENU” MUNCHOS CENTROS** (Colexos d'Infantil y Primaria, especialmente).

Otru de los problemes qu'atopamos ye la dexadez na educación destinada a les persones adultes ya que los **CENTROS D'EDUCACIÓN D'ADULTOS** entá nun **foron dotaos del profesoráu** interín necesariu pal so correutu funcionamientu. Con esto asistimos a la puesta en práutica de polítiques totalmente contradictories, porque anque dende va dellos años y dende distintos estamentos políticos



# SUATEA



## COMUNICÁU DE PRENSA - EDUCACIÓN

---

fomenten la formación pa les persones adultes que la deseyen, la realidá ye abondo distinta, yá qu'añu tres añu estos centros vienen sufriendo retayos nes enseñances que nellos s'ufierten.

Denunciamos la tardanza de l'alministración educativa en publicar les **bolses de trabayu** correspondientes a la especialidá de LLINGUA ASTURIANA Y GALLEGO-ASTURIANU, a pesar de teneles iguaes dende finales del cursu pasáu, lo cuál supón la esistencia de 30 places vacantes pendientes de ser ocupaes por profesoráu que tendría que tar trabayando dende empiezos del mes de setiembre y qu'al so pesar sigue engrosando les llistes del paru. Per otra parte, en dellos centros la Consejería ta poniendo torgues **a la constitución de Grupos en Bachilleratu**, incumpliendo la Llei d'Usu y promoción del asturianu y refugando aplicar la reciente sentencia sobre'l númberu mínimu d'escolares en Bachilleratu pa constituyir grupu.

La paralización de les obres d'ampliación y meyora de distintos centros públicos Asturianos, fai que l'alumnáu nun disponga de los espacios necesarios pa recibir una enseñanza calidable col agraviu que supón respetu al restu de compañeros/as d'otros centros .

Nun podemos escaecer los graves problemes heredaos de cursos anteriores, como la discriminación ente docentes pola llamada LLEI D'EVALUACIÓN , que tienen que ser resueltos esti cursu.

Tres estes considerancies, dende SUATEA, sindicatu mayoritariu na enseñanza pública asturiana, encamentamos al Gobiernu a la solución d'esta problemática por aciu:

- D'una amplia ufierta d'empléu públicu pal cursu 11-12
- D'un presupuestu que respete'l desenvolvimientu de los programes educativos en funcionamientu cola calidá necesaria.
- D'el cumplimientu de les sentencies firmes más allá de la so mera publicación nel BOPA.
- D'una total trespresencia nos procesos d'ufierta y axudicación de puestos interinos lo mesmo que de la elaboración de les llistes correspondientes...

Y too ello ensin escaecer la esmolición de la comunidá educativa ante los graves retayos que, cola escusa de la crisis económica, tán sufriendo otres CCAA y que tán suponiendo un ataque brutal a la Escuela Pública.

Uviéu, 21 de setiembre de 2011